

**ОКТАБРЯ В 1-й ДЕНЬ.**

**ПРЕПОДОБНАГО ОТЦА НАШЕГО РОМАНА, ПЕВЦА  
КОНДАКОВ.**

**На вечерни стихиры, глас 1.**

**Подобен: Небесных чинов:**

**К**раснопеснивая цевница Божественного Духа, / славий и шур Божественных песней, / свирель церковная / всем нам своя предлагает сладкопесенная учреждения / и тем веселит Богомудрия.

**С**ветлейший светильник и прозарнейший, / сладковещанная гусль, / струя благознаменитых Духа словес / поет ясно, научая концы / немолчными песнями славословити Божества едину зарю.

**Т**ы, Владыце всех яко предстоя / и дерзновение, отче, к Нему стяжав, / нам, совершающим память твою и светлое твое торжество, моли избавитися бед и напастей, / Романе Богоблаженне.

**Иные стихиры, глас 4, списаны из древлия Миней.**

**Подобен: Дал еси знамение:**

**С**ловес твоих виды, / яко твердаго камене воды, / медвянообразны сущи, / в мире прострешася, / пустыя смыслы напаяют богатно, / и крепостию державною / жизненныя ради силы Божия / ссати всем подают, / умащая приснотекущая повелений твоих масло, / Романе всечестне.

**В**озвышь гусли своя, / мысленный отче, / вещании, яко Давид / Богодухновенный ударяеши, / скача добродетелей светом, / пред Кивотом течеши, / пред Церковию играеши, / люди новыя препроважда, / и ныне на Небесный Сион вышний возводя / верно воследующих ти, / свою благодать подал еси.

**С**илою Зиждителя си, / о Романе всечестне, / яко облак Богосотворен, / истачаеши глагол твоих / священныя капля и мира напаяеши, / плод носиши Боголепен, / детельным словом житие Божественное. / Тем твою блажим священную память, славне, / Спаса и Господа прилежно моли.

**Слава, глас 6:**

**П**ервое добрых начало / явился еси спасения вина, Романе, отче наш; / Ангельское бо составив песнопение, / Боголепно показал еси житие твое; / Христа Бога моли / напастей и бед избавити поющия тя.

**И ныне, Богородичен или Крестобогородичен.**

**Подобен: Трдневен:**

**В**идящя Тя распинаема, Христе, / Тебе Рождшая вопияше: / что странное еже вижу таинство, Сыне мой? / како на древе умираеши, / плотию повешен, / жизни Подателю?

### Тропарь, глас 3,

Подвигом поста, молитвы и бдения, / глубиною веры и смиренномудрия / от юности совлекся еси ветхаго человека, / равноангельному житию уподобився, / преподобне Романе Сладкопевче, / достоин был еси явления Богородицы, / яже повеле ти дивный свиток съести, / и тем препода ти дар песнотворения, / абие воспел еси, яко ангели небеснии, / славу Воплотившемуся из Нея Сыну Божию. / Молися за ны ко Господу, / даровати всем воспевающим Христа Жизнодавца / согласное пение, / мир и велию милость.

### Канон преподобнаго Романа, глас 6.

#### Песнь 1.

**Ирмос:** Яко по суху пешешествовав Израиль / по бездне стопами, / гонителя фараона / видя потопляема, / Богу / победную песнь / поим, вопияше.

Светосиянныя лучи от Небес нам низпосли / молитвами твоими, мудре Романе Божественне, / твою похвалити священную память песнями.

От юности весь ты Христу тя самого предложив, / последовал еси Ему, / светозарными сияньми ум с Небесе, Романе, облистывая.

Украшен добротою Вседетельнаго и Святаго Духа, / яко звезда светосиянная, / добродетелей светлостью, мудре, явился еси, Романе, мира концем.

**Богородичен:** Из Тебе пройде неизреченно Божие Слово собезначальное в последняя времена, / и перваго человека Адама во тлю падшаго, Богородице, воспасе.

#### Песнь 3.

**Ирмос:** Несть свят, якоже Ты / Господи Боже мой, / вознесый рог верных Твоих Блаже, / и утвердивый нас на камени / исповедания Твоего.

Ум твой, Романе мудре, бысть обителище Троицы Святыя, / исполняемь благочестно знания истиннаго, источчая Божественная проповедания.

Струи искипе течений честный твой язык, поя Божественная / и уясняя мудростно Христово к нам от Девы Рождество неизреченное.

Се питаеши обильно мудрыми ученьми и красными песнопении помыслы наша / и исполняеши сладости Божественныя, Романе Богогласе.

**Богородичен:** Всех еси воинств вышши, Дево, / тех бо Содетеля, Сына Божия, зачала еси во утробе / и, рождши, пребываеши Приснодева.

#### Седален, глас 5.

**Подобен:** Собезначальное Слово:

Насажден, якоже древо, отче блаженне, при исходящих вод постнических, / Божественным содейством плоды болезней твоих во время явственно Садоделателю и Творцу отдал еси. / Сего ради святую твою поем память, чувствуяще тя, Романе преподобне.

### **Слава и ныне, Богородичен:**

**В** Тебе таинство трепетное совершается, Девице, Сушаго Бога Слова от Отца в ложеснах зачала еси, / и раждаеши паче естества Человека совершенна.

### **Крестобогородичен:**

**На** Кресте зрящи Тя, Христе, Мати Твоя вольно посреде разбойников висяща, / растерзающися утробою, матерски глаголаше: / Безгрешный Сыне, како неправедно на Кресте, якоже злодей пригвожден еси, / человеческий род хотя оживити, яко Благоутробен?

### **Песнь 4.**

**Ирмос:** Христос моя сила, / Бог и Господь, / честная Церковь, / боголепно поет взывающи, / от смысла чиста, о Господе празднующи.

**П**риятилище был еси Божественнаго Духа и огнедохновенная уста, / возглашающая Божественная песнопения и наслаждающая души, Романе, притекающих ти.

**Я**ко цевница ты был еси Небесная и гусли, / всякую к себе влекущим мысль повестями твоими и красными твоими песнопении.

**Б**лагодать дхне и вселися в светоносную твою душу, / Вседетельнаго и Пресвятаго Духа, прехвальне, / и ты прятилище и мудра Боговещателя содела.

**Богородичен:** Яд излия в праматерния убо слухи змий, / но Ты, Чистая, сего истрясла ест, / Архангеловым гласом заченши и рождши Христа.

### **Песнь 5.**

**Ирмос:** Божиим светом Твоим Блаже, / утреннюющих Ти души / любовию озри, молюся, / Тя ведети Слове Божий, / Истиннаго Бога, / от мрака греховнаго взывающа.

**Я**ко благолепнейшо святилище, / сосуд яко чистейший, Утешителева благодать обретши тя, Романе Богомудре, / храм содела, светом украшен, и вселися.

**В**оплощеннаго Сына Божия Рождшая истинно твою душу просвети / и ум Божественнаго знания исполни в нощи представши тебе, Приснодева.

**С**писаньми твоих священных словес, приснопамятне, явився всем воистину сладчайший, / вся увеселяеши, всех просвещая ум и вся научая знанию спасительному.

**Богородичен:** Свет Рождшая, Отчее Слово Присносущное, Чистая, / свещательными молитвами Твоими просвети ум мой / о отжени тьму души моя, Пречистая Владычице.

### **Песнь 6.**

**Ирмос:** Житейское море / воздвигаемое зря / напастей бурю, / к тихому пристанищу Твоему притек вопию Ти: / возведи от тли живот мой, / Многомилостиве.

Просвещения исполняем и к высоте добродетелей Божественно возводим, / небрегл еси о всех земных: / и столп небесный, и светильник благочестия был еси.

Плоти увядил еси желания / и душу твою украсил еси светлейшими чистоты озареньми, / и доброту рачительную добродетелей благолепием обложил еси.

Возненавидев привременное и суетное, и гнилое, и течное наслаждение, / к храму Богородицы прилежа, ум освятил еси, и душу, и тело, достохвальне.

**Богородичен:** Все предзряще пророцы светло будущее послежди от Девы, Христе мой, / Твое на земли Рождество, / явственно Боговидцы провещаша.

### **Кондак, глас 8:**

Божественными добродетельми духа / измлада украсився, Романе премудре, / Церкви Христове пречестное украшение был еси: / пением бо прекрасным украсив Ю, блаженне. / Тем молим тя: подаждь желающим Божественного дарования твоего, / яко да вопием ти: / радуйся, отче преблаженне, красото церковная.

### **Песнь 7.**

**Ирмос:** Росодательну убо пещь содела ангел / преподобным отроком, / халдеи же опаляющее веление / Божие мучителя увеща вопити: / благословен еси Боже отец наших.

Богородицу Марию Богомудра имел еси Учителя, / вразумляющую тя, и научающую, и пети повелевающую: / благословен еси, Господи, Боже отец наших.

Возсиял еси в мире яко светлейшее солнце, Романе Богомудре, / и светло просвещая верою зовущия: / благословен еси, Господи, Боже отец наших.

Твоих глагол вещание вселенную исполни / и красно песнопети Христу человеки научи: / благословен еси, Господи, Боже отец наших.

**Богородичен:** Ныне блажат Тя вси роди человечестии, Богородице Чистая, / якоже прорекла еси, / и верою славят: / благословен, Пречистая, Плод чрева Твоего.

### **Песнь 8.**

**Ирмос:** Из пламене преподобным росу источил еси, / и праведнаго жертву водою попалил еси: / вся бо твориши Христе, токмо еже хотети. / Тя превозносим во вся веки.

**В**сю мира красоту, и сладость, и славу оттрясе, / душу твою вперил еси к Вышним ликом, к тамошним славам и светлостям, мудре, / к добротам неизреченным, к пребыванием тамошним, к свету Богоначалия, зовя: / Тя превозносим, Христе, во веки.

**Б**ожественным желанием распаляемь, / восхождения положил еси в сердца твоем и безплотное во плоти житие стяжал еси. / Ангельским чином подобяся, мудре, / тамо сущая возлюбил еси в мире песнопения, верою, Романе, зывая: / Тя превозносим, Христе, во веки.

**В**ысоковещанием Божественных твоих и сладчайших словес, блаженне Романе, / всяк помысл веселиши человеков и услаждаеши, якоже некий питатель богатотворный, / и просвещаеши светло и научаеши вопити: / Господа пойте, дела, и превозносите во вся веки.

**Богородичен:** Равнобожием прельстив мя, человекоубийца, змий лукавнейший, / яко пленника, исхити сладжсти райския, / но Владыка, естеством Сын Божий, воплощя, прииде от Девы Марии, и взят мя на высоту, обожив: / Егоже превозносим во вся веки.

## **Песнь 9.**

**Ирмос:** Бога человеком невозможно видети, / на Негоже не смеют чини ангельстии взирати: / Тобою же Всечистая, явися человеком / Слово воплощено. / Егоже величающе, / с небесными вои Тя ублажаем.

**Г**орнейшим, славне, ликом совокупился еси бесплотным, / идеже неизреченная пребывает радость и всегдашнее наслаждение, / идеже оный Богоначалия свет есть и веселие, / идеже неизглаголанная слава, блаженнейше.

**С** праведными внутрь Божественныя славы вселився, зриши красоту неизреченную оную, / зриши сладость нескончаемую, зриши доброты небесныя, истинно желанныя, мудре, / видиши патриархов лики, Романе славне.

**Т**вою светоносную память верно совершающия / от бед избави молитвами твоими, Богомудре, / и от всякаго вреда, Романе, и скорби чуждаго / и Небесныя славы получитьи сподоби и Царствия Горняго, блаженнейше.

**Богородичен:** От древняго падения человеческий род первозданнаго бысть пленен, Дево Богородице, / и поработен страстьми греховными, / но из Тебе рождейся Преплагий Бог Своим благоутробием того воззва.